


ton Seigneur. C'est luy qui fait rire & pleurer, il fait viure & mourir, il a créé le male & la femelle de toute chose, il donne & oste l'ame a l'homme quand bon luy semble, il est tres-riche, & n'a besoin de personne. Il est le Seigneur de la planette que les hommes ont adorée. Il a exterminé Aad & Temod, il a submergé le peuple de Noé qui estoit le plus deuoyé & le plus iniuste, il a bouluersé la ville Loth, & la couuerte de pierre bruslante. En qui croiront-ils s'ils ne croient pas en ton Seigneur. Ce Prophete est enuoyé pour vous prescher les peines del'Enfer comme ont fait les autres Prophetes qui vous ont precedés; Le iour du Iugement s'approche & personne ne sçait quand il viendra que Dieu, vous esmerueillez vous de ce discours; vous vous en mocquez & ne pleurez pas quand on vous parle, mais vous serez surpris en vos pechez, si vous ne vous humiliez deuant Dieu, & si vous ne l'adorez.

*LE CHAPITRE DE LA LVNE,
contenant cinquante-cinq versets,
escrit à la Meque.*

AV nom de Dieu clement & misericordieux. Le iour du Iugement s'approche, la Lune s'est partagée en deux, neantmoins les infidelles ne croyent pas les miracles quand ils les voyent, il disent que

c'est magie, ils mentent, & ne suivent que leur passion, mais tout est escrit. On leur a presché l'histoire des siècles passez remplie de conseils tres-salutaires; neantmoins les-Predicateurs leur ont esté inutiles; Esloigne-toy d'eux lors qu'ils seront appelez au iugement vniuersel qu'ils ne veulent pas croire, ce iour leurs yeux seront troublez de peur, ils sortiront de terre espars comme des sauterelles effrayées, ils accoureront à celuy qui les appellera en iugement, & diront, Voicy vn iour malheureux pour les mechans. Le peuple a cy-deuant dementy Noé, & a dit qu'il estoit demoniacle, Noé l'a exhorté, & a inuoqué son Seigneur, à la fin il a dit qu'il n'auoit plus de force, & qu'il estoit vaincu par la malice des hommes, alors il a esté puissamment secouru, nous auons ouuert les portes des Cieux, & fait tomber vne pluye extraordinaire, nous auons fait sortir des fontaines de dessous la terre, les eaux du Ciel & de la terre se sôt assemblees, & ont submergés les infidelles à cause de leurs pechez, Nous auons sauué Noé dedans l'Arche bien cheuillée & bien espalmée, elle couloit sur les eaux par nostre permission pour seruir de marque de nostre toute-Puissance, y aura-t'il quelqu'un entre les infidelles de ce temps qui y pense? penseront-ils à la punition de leurs crimes, & aux peines de l'Enfer? Nous auons rendu l'Alcoran facile à comprendre, y aura-t'il quelqu'un qui l'estudie? Les impies qui ont dementy Aad ont esté chastiez, mais de quel chastiment! Nous auons enuoyé contr'eux vn vent impe-

rueux en vn iour infortuné pour eux, qui a fait tomber les hommes comme des palmiers deracinés, considere quelle a esté leur punition, nous auons rendu l'Alcoran intelligible, y aura-t'il quelqu'un qui l'estudie? Temod & ses gens ont dementy les Prophetes, & ont mesprisé leurs exhortations, ils ont dit, il y a vn homme entre nous qui vous deuoyera du droit chemin, si vous le suiuez, il vous conduira dedans l'enfer; a-t'il esté esleu entre nous pour receuoir seul les inspirations de Dieu? Au contraire, il est vn imposteur; mais à la fin ils ont cognu ceux qui ont esté meschans & menteurs. Nous auons enuoyé le chameau pour esproouer les infidelles, leur Prophete a obserué ce qu'ils ont fait, & a esté patient, l'eau a esté partagée pour eux & pour le chameau, & chacun a trouué a boire à son iour, neantmoins ils ont appelé leurs cōpagnés, & ont tué le chameau de Salhé, mais de quelle façon ont-ils esté chastiez? i'ai lancé le tonnerre contr'eux qui les a rendus secs comme de la paille; nous auons rendu l'Alcoran facile à comprendre, y aura-t'il quelqu'un qui l'estudie? Les concitoyens de Loth l'ont dementy, & ont mesprisé ses instructions, Nous auons enuoyé contr'eux vn vent chaud avec des pierres brullantes qui les ont exterminés, & auons le matin sauué Loth avec sa famille par nostre grace speciale, ainsi ie recompense ceux qui sont recognoissans de mes bienfaits, Loth leur auoit presché les peines de l'Enfer, nous les auons surpris lors qu'ils dispuoient contre ses exortations, ils ont



Pagination incorrecte — date incorrecte

NF Z 43-120-12

veu entrer les hostes dans la ville en figure d'hommes, nous auons esbloüy leur veüe, & auons dit, Goustez, ô meschans, la punition de vos pechez; le matin ils ont esté chastiez par vn chastiment perpetuel, parce qu'ils auoient mesprisé les paroles de Loth. Nous auons rendu l'Alcoran intelligible, y aura-t'il quelqu'un qui l'estudie? Certainement on a presché les gens de Pharaon, ils n'ont pas voulu obeïr à ma loy, & ont mesprisé mes miracles, mais nous les auons surpris en leurs pechez; Les infidelles qui sont entre vous valent-ils mieux que ceux qui les ont precedez? trouuez-vous quelque salut pour eux dans l'escriture? Diront-ils qu'ils obtiendront victoire sur les fidelles? Au contraire, ils sont vaincus & tournent le dos. Certainement l'heure de leur punition viendra bien-toft, leur terme s'approche, & leur peine dedans l'Enfer sera plus grande que celle de la terre, ils sont entierement deuoyez du chemin de salut, & seront trainez & precipitez la teste premiere dedans les flammes eternelles. Nous auons creé toutes choses par nostre seule Puissance nous n'auons dit qu'un mot, & en vn clain d'œil la chose a esté, nous auons exterminé cy-deuant vn grand nombre d'infidelles semblables à eux, y aura-t'il quelqu'un qui y pense? tout le bien & tout le mal qu'ils ont fait est exactement escrit. Les gens de bien habiteront dans des iardins delicieux, ils boiront dans des fleues eternels, ils ne diront point de mensonges en leurs assemblées, & demeureront eter-

nellement auprès du tres- maictueux & tout - Puissant.

LE CHAPITRE DV MISERICORDIEUX, contenant dix-huict versets, escrit à la Medine.

AV Nom de Dieu clement & misericordieux. Le misericordieux a enseigné l'Alcoran, il a créé l'homme & luy a donné l'usage de la raison, il a créé le Soleil & la Lune pour compter les saisons; les estoiles & les arbres l'adorent, il a esleué les Cieux, il a estably la iustice, & a ordonné de peser a bon poids, il a créé la terre pour l'abitation des hommes, & toute sorte de fruiets, de grains & de feüilles, il a créé les vents & les tourbillons, ô (hommes & Demons) quel Seigneur reniez- vous autre que vostre Seigneur? Il a créé l'homme de terre comme vn pot, & a créé les Demons de la flamme du feu, quel Seigneur reniez-vous autre que vostre Seigneur? Il est Seigneur des deux Ponans & des deux Leuans, quel Seigneur reniez-vous autre que vostre Seigneur? Il fait mesler l'eau douce avec l'eau salée, & l'vne se mesle facilement l'vne avec l'autre, quel Seigneur reniez vous autre que vostre Seigneur? Il fait sortir de la mer les perles & le corail, quel Seigneur reniez vous autre que vostre Seigneur? il a créé les nauires qui coulent sur